



## Schnitzel - Psalm

Letschd Wuche han'y gmaint y haig d'Blauzunggegrangged und wär hitt fascht nit koo wäg dere Panik do immer in de Meedie, s'wurd wieder e Virus umme goo no han'y e bitz Angscht gha und bi no schnäll zem Doggter mi go untersueche loo no hett dä mi duure tscheggt und gsait, y miess halt denn noonemol koo är miess mir no e Bluetbroob, e Urinbroob, e Spermabroob und vom Stuehl e Broob nää no han'n ych em denn halt – dass er grad alles zämme hett – myni Boxer-Shorts gää.

Hätt y aber e String a gha, no wär das nodyrilig nit gange denn soone String braichsch jo nimm und s'blybt jo au nyt dinn hange.

13 Joor alt isch dr Bueb jetz - vo dr Familie Salathé und jetz stüürt er immer, är mecht gärn go schutte zem FCB jä wenn'd wotsch go schutte, sait denn d'Muetter, do han'y gar kai Miech aber d'Maitli muesch dr denn uss em Kopf schloo, fir e Schatz z'ha isch's no e bitz z'fried no sait dr Vatter waisch Bueb, das mit de Maitli will d'Mamme halt nit akzeptiere aber gang doch du zem FC Thun, deert kasch grad baides trainiere.

Wytt iibere Million Mensche sinn dä Knut go luege und fotografiere und ych wundere mi mängisch wäge was die Schwoobe eso iiberall aane marschiere s'kunnt halt sälte e Schwoob ellay, s'kemme immer grad Millioone die sinn halt au liecht z'brgaischtere, sinn labil und voll Illusioone drum empfiel ych do jedem – und das main nit nur ych ellay bhaltet doch uff alli Fäll rmoll s'Sturmgewehr no dehai.

E Kolleeg vo mir und sy Frau, also dasch ebbis won'y nit ka verstoo die hänn uss em Bundeshuus vo dr Frau Calmy e'n Yyalaadig bykoo si sinn yyglaade gsi fir uff's Rütli am eerschte Auguscht no hett my Kolleeg aber absait und hett gschriebe: Ich habe nicht so sehr Luscht was soll ich denn da auf das Rütli uffen steigen wenn ich daheim grad so gut kann auf meinem Ruthli liegen.

In mym Kiehlschrangg dehai isch e Komplott im Gang ame Schwynsblätzli und ame Mettwirschtli stinggt's efang und dr Leisi isch daigig und die im Girat-Glas gurggt's langsam aa und s'Joguurt isch hässig und d'Milch isch suur näbedraa und em Schwartemaage liggt's uff em Maage und dr Mozzarella isch am motze und dr Angge isch ranzig und em Birchemiesli isch's zem kotze und dr Tilsiter proteschiert mit drey Gärber-Schaiblette und si halte zämme und versueche em Glepfer sy Hutt no z'rette.

So vuyt Gratiszyttige, s'isch efang nimm normal und s'wärde immer mee y ha do kirzlig nääbenenander scho 8 eso Zytigskäschte gsee und in jedem vo däne Blettli stoht jo praggtisch s'Glych denn isch mer do emol ebbis passiert wo'n y bi däne Käschte näbeduure schlyych ych läng in ain vo däne Käschte zem nach ere Zyttig z'taschte no han'y verglemmi gmerggt, y ha jo my Hand in soomen griene Robi-Dog-Kaschte.

Im Prinzip saisch zwar baidem glych, das isch unbestryttig em Inhal vo vommene Robi-Dog und em Inhalt vo soonre Zyttig.

Y bi no nie e Sousa go foone und no nie e Schlag go zyyge und no nie e Flügel go hoorne und no nie e Bass go gyyge y bi no nie e Klari go nette und no nie e Drum go peete und no nie e Po go suune und no nie queer go fleete und e Sagg go duudle find y gruusig drum gang y au nie in e Guggemuusig.

D'Martina Hingis leggt jetz schyns dr Tennisschleeger uff d'Sytte und bedrybtt jetz en andere Sport – si goot jetz nämmlig go rytte und si isch jetz mit ihrem Ross scho iiber Gräabe gumpst und iiber d'Stange aber jetz hett si dä Gaul scho miesse verkaufe, s'isch aifach nimmi gange das Ross isch drum vill z'hööflig gsi, si ka's fascht nit verstoo denn vor de Hindernis hett's immer zeerscht dr Hingis dr Vortritt gloo.

All Daag nach em Fyyroobe wartet d'Chantal uff ihre Schatz bim Casino am Egge uff em Barfiesserplatz denn hett si Nai gstumme fir dä neiji Casino-Ersatz denn bimme Nejbau kennt si jo nimm warte an ihrem Lieblingsplatz und wenn si nit gstorbe isch wartet d'Chantal uff ihre Spatz jetz halt immer no bim Casino uff em Barfiesserplatz.

Du Tschumpel, du Hoomoggs, du Waichei, du Dottel du Daigaff, du Furzbaschteete, du Laaferi, du Drottell du Dräggsagg, du Halbschueh, du Schrumpfkopf du mischtige du Filzluusbängel du hinterlischtige du arrogante Sogge – du abnormaale y frai my jetz scho uff die näggschte Bundesroots-Wahle.

Y ha jetz au soone Navigationsgräätli ins Auto montiert es isch's nejschte und s'intelligäntische wo uff em Märt exischiert zem's teschte han'y als Ziel gwählt die Brugg am Birskepflü unde no hett die Stimm uss afo lache und gsait: die Brugg isch scho lang verschwunde und won'y uss Plausch s'Ziel Ziiri Bellvueplatz wähl sait die Stimm, nundefaane wänn si doch nit villicht lieber naime anders aane.

Also ych sag Eych das Internet isch scho e fantastische Sach wo'n ych do iberall iine kumm und was ych mit däm alles mach z.B. mit www. striggede kunnsch dirägg uff d'Hompeitsch vo dr SVP und uff dr Sytte Sarkosy & Bruni hani no gladdi Bildli gsee no hani dr Ton yygstellt und gheert wie die Bruni dä Sarkosy neggt und sait: wenn dini Software nur e bitz Hardware, wär alles perfergt.

Und jetz hätt y do no e paar Schnäppli, wenn epper Inträssi hett y verkauf e Rolex fir 200 Frangge, wenn die ebber wett und e Ford Fiesta fir tausig Stutz, 4 Joor alt, e gladd's Wägeli und fir e Lappe e Original, 40x80 vom Jean Tinguely ybruuch drum dä Stutz fir e grosse Wunsch und Winsch hänn jo die maischte y mecht mer drum wieder emol inere Baiz kenne e Kaffi laischte.

Jetz hett mir do my Doggter grad no e SMS duure gää är haig denn uss myne Boxer-Shorts sämtligi Broobe kenne entnää aber s'haig no anders Zyg dinn gha, zem Byschpiil Mandariinli-Kääre und Dannenoodle und so Breesmeli vo Zimmedstääre und ych haig nyt – ych sey gsund und fit und frisch nur e bitz närvees will d'Wiehnacht so spoot gsi isch.

---

Wotsch au by uns bänggle ?  
Schigg doch aifach e Brief in unser Boschtfach  
VSG Postfach 4365 4002 Basel  
Oder goosch uff, [www.vsg-basel.ch](http://www.vsg-basel.ch)

---

Drugg: H. Leidenfrost AG Basel